



Nicolaus ille natus est anno 1519. Is præclara indole & felici ingenio exornatus, à pueris operam literis dedit, & prima fundamenta egregie iecit. Postea quoq; ad artium & linguarum studiũ conuersus, adeò profecit, ut supremam in ijs lauream meruerit. Huic eruditioni & uitæ integritatẽ ac morum innocentiam adiecit. Accedebat & singularis eloquẽtia, quam partim natura, partim arte sibi comparabat. Postea Theologiæ incubuit, & sacras literas sibi familiares reddidit. Id cum Philippus Landgravius intellexisset, eum curiæ suæ concionatorem cõstituit, & uerbo Dei familiam suam pascere iussit. Cum eam prouinciam aliquandiu

cum laude sustinuisset, tandẽ Marpurgensis pastor electus est. Eam ecclesiam is etiamnum Euangelij doctrina instruit, atq; etiam ut omnia decenter fiant, instituit. Est Nicolaus mira humanitate etiã erga ignotos præditus. Itaq; cum anno 1562 Marpurgi essem, atq; Martyrum historiam illustris. principi offerrem, Nicolaus me benigne suscepit, & omnis generis humanitatis officia exhibuit, ita ut meritò ipsum ob uarias animi uirtutes in optimorum amicorũ numerum ascriperim, atq; dignum censuerim, qui ob eruditionem & pietatem omnibus bonis & doctis commendetur. Anon.